

Setiausaha Agung Umno Dilantik Menteri
mStarOnline
15 Mei, 2013

KUALA LUMPUR: Selepas lima tahun, Setiausaha Agung Barisan Nasional (BN) Datuk Seri Tengku Adnan Tengku Mansor, kembali menganggotai kabinet baharu pada Rabu, memegang jawatan Menteri Wilayah Persekutuan.

Tengku Adnan, 63, adalah anggota parlimen Putrajaya pernah menyandang jawatan menteri pelancongan pada 2006 hingga pilihan raya umum 2008.

Beliau juga pernah dilantik sebagai timbalan menteri di Jabatan Perdana Menteri dari Januari 2001 dan kemudian pada November 2002, dilantik sebagai menteri di Jabatan Perdana Menteri sehingga pilihan raya umum 2004.

Tengku Adnan yang mempunyai latar belakang dalam bidang perniagaan termasuk menjadi pengarah kepada beberapa syarikat terkemuka dan disenaraikan, merupakan anak kelahiran Melaka dan memiliki ijazah sarjana dalam bidang pengurusan perniagaan dari University of Southern California, Amerika Syarikat.

Beliau mempunyai sembilan orang anak hasil perkongsian hidup dengan Datin Seri Enny Beatrice Ferlat Kusumo Anggraini. Setiausaha Agung Umno itu melibatkan diri dalam politik ketika berusia 19 tahun dengan menyertai Umno dan pernah menyandang jawatan ketua pemuda Umno Bahagian Setapak.

Pada tahun 1988, beliau dilantik sebagai bendahari Pergerakan Pemuda Umno dan kemudian pada tahun 1993 sebagai anggota Majlis Tertinggi (MT) Umno.

Hakcipta Terpelihara © 1995-2013 Star Publications (Malaysia) Bhd

Source:

http://mstar.com.my/berita/cerita.asp?file=/2013/5/15/mstar_berita/20130515182259&sec=mstar_berita